



UPA 2014/150

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Aningaasaateqarfiup aningaasaataasa ilaannit procentit qassit ukiumut atugassiarineqarsinnaasanersut erseqqissaavigineqarsinnaaqqullugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalakkersuisut peqqunegarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Naaja H. Nathanielsen, Inuit Ataqatigiit)

### Tungavilersuut

Aatsitassarsiornermi Aningaasaateqarfimmi aningaasat katersat ileqqaakkallu erniaat kisimik siunissami atorineqarsinnaalernissaat pillugu siunnersuutiga 2013-imi ukiakkut Inatsisartuni amerlanerussuteqartut itigartitsissutigivaat<sup>i</sup>.

Siunnersuut tungaveqaralarpoq aallaqqaataanit pisumik inatsisip siunertaanik. Siunertalli tamakku inaarutaasumik inatsimmi erseqqarluppallaartumik aalajangersaavigineqarput<sup>ii</sup>, naak taamani Aningaasaqarnermut Ataatsimiititaliaasup tikkuaralaruaa erniat kisimik siunissami atorineqartariaqaralarput.

Sukaterisoqarnissaa Aningaasaqarnermut Siunnersuisoqatigiit 2012-imi aamma inassuteqaatigivaat. Aningaasaqarnermut Siunnersuisoqatigiit nassuiaapput Aatsitassarsiornermi aningaasaateqarfinnut allanut naleqqiullugu naliliinermi Kalaallit Nunaanni aatsitassarsiornermi aningaasaateqarfik aningaasat atorineqarnissaat pillugu annertuumik erseqqinngitsunillu toqqammaveqartoq.

Erniat kisiisa atorineqartarnissaat soorunami siunertaqarpoq kinguaariit takkukkumaartut uagutsitulli pisuussutinik uumaatsunik atuinermi iluaquserneqarnissaannik. Tamatumani pineqarpoq kinguaariit takkukkumaartut inuiaqatigiillu kalaallit illersugaanissaat.

Aningaasaateqarfimmit erniat kisiisa atorineqarsinnaanerat massakkut amerlanerussuteqartuusut ataasiarlutik itigartitsissutigereernikuuaat. Uangani naliliinera naapertorlugu aatsitassarsiornermit isertitassat kingunissatsinnut qularnaarneqarnissaat annertuumik suli pisariaqartuuvoq. Imaangilaq uagut nalitsinni aatsitassat iluaqusersuutigilernaviangikkigit. Kisianni siunissaq Nunattalu siunissami napasinnaassusia eqqarsaatigisariaqarparput. Aatsitassammi nunguppata kingulissatta suut inuussutigisagamikkit?

Taamaammat Inatsisartut massakkut qinnuigaakka qinigassanik tikkuaaqqullugit. Naalakkersuisut, Inatsisartut qanimut suleqatiginerisigit, qinnuigaakka aatsitassarsiornermi aningaasaateqarfiup aningaasaataasa ilaat qanoq amerlatigisut aammalu ilaat qanoq amerlatigisut kingusinnerusukkut iluaqutigineqartussatut atorineqarsinnaanerat pillugu ersarinnerusunik killiliussassalioqqullugit.

Aningaasat qanorpiaq amerlatigisut pineqassanersut tikikkusunngilara. Apeqqut manna pingaarutilik pillugu Inatsisartuni ataatsimiititaliamilu susassaqarfiusumi sukumiisumik oqallittoqassasoq kissaatigaara, kiisalu Inatsisartut Naalakkersuisullu akornanni qanimut oqaloqatigiittoqarnissaa.

**Pisortanut aningaasatigut allaffissornikkullu kingunerisassat.**

Inatsimmut siunnersuutissap suliarinerani aningaasartuutissat killeqarnissaat ilimagineqarpoq inatsit pioreersoq matumani erseqqissaavigineqarnissaa pineqaannarmat.

**Namminersorluni inuussutissarsiuqeqarnermut aningaasatigut allaffissornikkullu kingunerisassat.**

Siunissaq qaninnerusoq ungasinnerusorluunnit isigalugit soqanngilaq. Siunnersuulli aallaavigalugu piffissap qaninnerusup ingerlanerani aningaasarsiornikkut akisussaaffeqangitsumik ingerlatsineq pinaveersaartinneqarsinnaavoq, taamaammallu siunnersuutigineqartoq inuussutissarsiornermik ingerlatsisut atugassarititaannut siunissaq ungasinnerusoq isigalugu aningaasarsiornikkut patajaallisaaqataasinnaalluni.

**Innuttaasunut aningaasatigut allaffissornikkullu kingunerisassat.**

Siunnersuut aallaavigalugu piffissap qaninnerusup ingerlanerani aningaasarsiornikkut akisussaaffeqanngitsumik ingerlatsineq pinaveersaartinneqarsinnaavoq, taamaammallu siunnersuutigineqartoq innuttaasut atugassarititaannut siunissaq ungasinnerusoq isigalugu aningaasarsiornikkut inuunikkullu patajaallisaaqataasinnaalluni.

---

<sup>i</sup> 2013-imi ukiakkut ataatsimiinneq, immikkoortoq 77

<sup>ii</sup> § 2. Inatsisip siunertaraa namminersornerusut aatsitassanit isertitaasa inissinneqartarnissaat atorneqartarnissaallu pillugit malittarisassiuussinnissaq kiisalu Namminersornerullutik Oqartussat aatsitassanit isertitaasa siunissaq ungasinnerusoq eqqarsaatigalugu tunngavissaqartinnissaasa eqqarsaatigineqarnissaat.

Imm. 2. Inatsisip siunertai eqquutsinniarlugit aningaasaateqarfiup makku siunertarai:

- 1) Namminersornerusut aatsitassanit isertitai pissarsiarinissaat,
- 2) aningaasaateqarfiup aningaasaatai ima inissinneqassasut, isumannaassuseq anguneqassalluni kiisalu sapinngisamik amerlanerpaanik iluanaaruteqartinneqassallutik,
- 3) qularnaarneqassaaq aningaasaateqarfiup aningaasaatai namminersornerusut aatsitassarsiornermik sammisaqarnermi aningaasalersuinerannut kiisalu aatsitassarsiornermik sammisaqarnermi aningaasartuutunut matussusiinissanut atorneqassallutik inatsisartut inatsisaanni matumani malittarisassat malillugit kiisalu Inatsisartut aningaasanut inatsisaanni imaluunniit ilassutitut aningaasaliissutini Inatsisartut akuerisaat naapertorlugit,
- 4) tamakku saniatigut qulakkeerneqassaaq aningaasaateqarfiup aningaasaatai taamaallaat namminersornerusunut tunniunneqarsinnaasut inatsisartut inatsisaanni matumani malittarisassat malillugit kiisalu Inatsisartut aningaasanut inatsisaanni imaluunniit ilassutitut aningaasaliissutit Inatsisartut akuerisaat naapertorlugit, aammalu
- 5) qulakkeerinneqataassalluni aningaasaateqarfiup aningaasaatai ima atorneqassasut, Kalaallit Nunaanni inuiaqatigiit siunissami ungasinnerusumi inuiaqatigiit aningaasarsiorneranni sapinngisamik amerlanerpaanik iluanaaruteqartinnissaat sapinngisamillu iluaqutaanerpaamik siunniuteqartinneqassallutik.